

**PKR menuntut audit dan inkuiri untuk bersihkan SPR**  
**The Malaysian Insider**  
**23 Mac , 2012**  
**Oleh Mohd Farhan Darwis**

KUALA LUMPUR, 23 Mac — PKR mendesak Suruhanjaya Pilihan Raya (SPR) agar membenarkan satu audit dan inkuiri dilaksanakan ke atas badan tersebut bagi membersihkan imej mereka ataupun pengerusinya harus bersedia untuk meletak jawatan.

Naib Presiden PKR Fuziah Salleh (gambar) dalam satu kenyataan hari ini berkata, Pakatan Rakyat (PR) dan PKR mahukan SPR mempunyai imej yang bersih dan menjawab segala persoalan berkenaan daftar pengundi oleh rakyat.

“Prosedur sedia ada terbuka kepada penyalahgunaan dan berkemungkinan besar telah mewujudkan “Sistem B” dalam SPR.

“Pangkalan data SPR boleh dipersoalkan kerana berlakunya pelbagai manipulasi terhadap Daftar Pemilih yang mencemarkan imej dan kredibiliti SPR,” jelas Fuziah menulas berkenaan isu pengumpulan pengundi di Parlimen Pekan.

Malah, Ahli Parlimen Kuantan ini turut mempertikaikan jawapan yang diberikan oleh pegawai SPR berhubung jawapan mereka berkenaan isu Zarina Tausi dan menegaskan kenyataan tersebut adalah cubaan untuk menutup kesalahan mereka.

“Jawapan yang diberikan pegawai SPR itu adalah seperti “Kambing Hitam” yang digunakan untuk menutup kesalahan mereka.

SPR sebelum ini menjelaskan bahawa dakwaan penipuan daftar pemilih yang didedahkan oleh Ketua Pembangkang, Datuk Seri Anwar Ibrahim tempoh hari sebenarnya kes tulen pengundi biasa yang memohon untuk menjadi pengundi tidak hadir (PTH).

Menurut seorang pegawai kanan SPR yang enggan namanya disiarkan, semakan yang dibuat dengan jabatan IT suruhanjaya itu mendapati pengundi Zarina Tausi hanya didaftarkan sekali sahaja dalam daftar pemilih.

Katanya, nama Zarina sebelum ini berada di dalam daftar induk sebagai pengundi biasa tetapi telah memohon untuk menjadi pengundi tidak hadir pada 20 Disember 2011 kerana suaminya berkhidmat dalam tentera.

Pegawai itu berkata tanda (/) pada akhir nombor kad pengenalan itu juga telah menimbulkan salah faham yang seakan bermaksud pengundi itu telah didaftarkan dua kali.

Katanya, rekod yang sedang diproses mempunyai tanda tersebut adalah untuk memisahkan nombor kad pengenalan baru dan nombor kad pengenalan lama.

Ketua umum PKR sebelum itu di Parlimen telah mendedahkan bagaimana SPR telah melakukan “penipuan” dalam memanipulasi daftar pengundi dengan nama dan nombor kad pengenalan pengundi dengan mengemukakan contoh pengundi yang didaftarkan di Pulau, Johor didaftarkan semula sebagai pengundi baru di Pekan, Pahang.

Jelas Anwar, jika mereka memasukan data yang sama, komputer akan menolaknya, lalu mereka menambah tanda pangkah (/) selepas nombor kad pengenalan dalam pendaftaran baru.

The Malaysian Insider

Hakcipta © 2012 The Malaysian Insider

Source: <http://www.themalaysianinsider.com/bahasa/article/pkr-tuntut-audit-dan-inkuiri-untuk-bersihkan-spr/>